

四庫全書

子部

欽定四庫全書

子部

意林卷三

詳校官中書<sub>臣</sub>潘有為

員外郎<sub>臣</sub>牛稔文覆勘

總校官編修<sub>臣</sub>王燕緒

校對官助教<sub>臣</sub>金學詩

謄錄監生<sub>臣</sub>張裕亨

欽定四庫全書

意林卷三

鹽鐵論十卷

桓寬

唐馬總撰

並是文學與大夫相難 善剋者不戰 善戰者不師 善  
師者不陣 工不出則物用乏 商不出則寶貨絕 川  
原不能實 漏卮山海不能贍 溢欲宅近市則家富富  
在術數不在力耕 善歌者使人續其聲 善作者使人

治其功 孔子能方不能圓故飢於黎丘 茂林之下  
無豐草大塊之間無美苗 行遠者假於車濟海者因  
於舟成名者因於資歐冶能因國君銅鐵作金鑪大鐘  
而不能自作壺鼎盤盂 香餌非不美龜龍聞而深藏  
鸞鳳見而高逝玉屑滿篋不成其實仲尼之門七十子  
去父母捐家負荷而隨孔子不耕而學其亂愈滋猶玉  
屑滿篋也若能安國利人寧須文辭者哉 有粟而不  
能食無益於饑觀賢而不能用無益於利 歌者不期

於利聲而貴於中節論者不期於麗辭而務在事實  
公卿者四海之儀表神化之丹青上有輔明主之任下  
有隨聖化之治 諸生抱枯竹守空言不知趨舍之宜  
時世之變林中多疾風富貴多謏言 古者君子思德  
小人思利今人堅額健舌代以致業 九層之臺傾公  
輸子不能正大朝一邪伊望不能復吏道雜而不選

富貴以財買官垂青綬擢銀龜擅殺生之柄專萬民之  
命乘肩驅良列騎成行者不知負擔步行之勞中國與

邊境猶支體與腹心肌膚寒於外腹心疾於內以仁義阻之道德塞之賢人守之則莫能入也秦法繁於秋荼網密於凝脂然而上下相遁姦偽並生廐焚孔子問人不問馬賤畜貴人也秦法盜馬者死盜牛者刑苛也

說苑二十卷

劉向

東風則靡而西西風則靡而東上之化下如風靡草禹見罪人下車而泣左右曰此人不恭故得罪君王何痛之禹曰堯民以堯為心今百姓各以其心為心故痛

之齊景公出獵上山見虎下山見蛇問晏子曰此不祥耶晏子曰有賢而不知知而不用用而不任此不祥也山是虎之室澤是蛇之穴何不祥也晏子侍景公

公朝寒請進煖食於寡人對曰嬰非厨養之臣社稷之臣晉平公問師曠曰吾年七十欲學恐晚如何師曠曰日暮豈不炳燭耶臣聞少而學者如日之出陽壯而學者如日中之光老而學者如炳燭之明豈不愈於暗乎公曰善哉曾子衣弊而耕魯君使人致其邑不受

曰吾聞受人者畏人與人者驕人安知君能不驕我我  
能不畏乎遂不受 夫仕者身歸於君祿歸於親忠臣  
不仕二君貞女不更二夫 居無垣牆人莫之毀傷行  
無防衛人莫之暴害此君子之行也 楚莊王賜羣臣  
酒燭滅有引美人衣者美人援絕其纓告王王曰賜人  
酒醉乃顯婦人之節吾不取也乃命左右勿上火凡與  
寡人飲者不絕纓者不盡歡也羣臣遍絕纓而後舉火  
後與晉戰引美人衣者五合以報莊王 陽虎得罪於



衛北見趙簡子曰自今以後不復樹人矣堂下之人臣  
所樹者過半今反危臣矣簡子曰樹桃李者夏得休息  
樹蒺藜者秋得其刺今子所樹蒺藜也自今以後擇人  
而樹之 夫政者無迎而拒無望而許臨財莫如廉臨  
富莫如平廉平之守莫能攻 國不務大務得民心佐  
不務多務得賢俊 齊宣王謂淳于髡曰先生云寡人  
何好對曰古者所好者四而王所好者三古者好馬王  
亦好馬古者好玉王亦好玉古者好色王亦好色古者

好士王不好士王曰國無士耳若有寡人亦好之對曰  
驂騑騏驎本無王求之豹象之胎本無王求之毛嬙西  
施本無王求之而不求士何也 楊回見趙簡子曰臣  
居鄉三逐事君五去聞君好士故來左右曰居鄉三逐  
是不容於衆也事君五去是不忠於上也 簡子曰美女  
者醜婦之仇也盛德君子者亂世所疎也正直之行邪  
枉所憎也遂用之作相 衣成則缺衽宮成則缺隅示  
不成也鬼神害滿也 周公誡伯禽示無以魯驕人

國有五寒凍不預焉一曰政二曰厲三曰謀泄四曰不  
敬士而國敗五曰不能治內而務外 官不與勢期而  
勢自至勢不與富期而富自至富不與貴期而貴自至  
貴不與驕期而驕自至驕不與罪期而罪自至 魯有  
恭士行年七十其恭益甚魯君問曰長年恭可以釋也  
對曰君子恭以成名小人恭以除刑一言不安尚有蹉  
跌一飯雖美尚有哽咽鴻飛于天矰者得之虎豹雖猛  
人食其肉譽人者少惡人者多得不恭乎 歲饑民疾

疫不足患也大臣祿重而不極諫近臣畏罪而不敢言  
此大患也 趙襄子謂子路曰吾嘗問孔子曰先生事  
七十君豈無明君耶孔子不對何謂賢也子路曰建天  
下之鳴鐘撞之以槌豈能發其聲乎善夜居者不能早  
起盛於彼者衰於此長於左者短於右 一貴一賤交  
情乃見一死一生乃知交情 口者兵也出言不當反  
自傷 丹所藏者赤漆所藏者黑君子慎所藏也 飛  
鳥愛羽虎豹愛爪所以輔身也 積思曰愛積愛曰仁

積仁曰靈臺靈臺者積仁也神靈者天之本 晏子為  
上卿妾不衣帛馬不食粟何以華國對曰德以華國不  
聞以妾與馬 趙簡子乘弊車瘦馬衣殺羊之裘其宰  
曰車新則安馬肥則疾狐裘則溫君宜改也簡子曰君  
子服善則益恭小人服善則益踞 子貢謂子石曰何  
不學詩子石曰父母求吾孝兄弟求吾悌朋友求吾信  
何暇學哉子貢曰損吾詩學子詩 河平四年都水使  
者諫議大夫劉向上言曲彌高者和彌寡水所以載舟

亦能以覆舟 楚丘先生年七十披裘見孟嘗君君曰  
先生老矣何以教寡人先生曰欲使追車趨馬逐鹿搏  
虎吾即死矣何暇老耶若使決嫌疑定猶豫吾即少也  
何老之有孟嘗乃有愧色 魏王欲築中天之臺曰敢  
有諫者死許綰負蓐操畚入曰聞王欲為中天之臺願  
効力焉臣聞天去地一萬五千里今王因而半之應高  
七千五百里基廣八千里盡王之地不足以成臺址王  
宜起兵伐諸侯盡有其地猶不足也又伐西夷乃足之

矣須且材木人徒稱此乃可作也魏王默然後乃罷築  
有遺鄭相魚不受人曰子嗜魚何故不受對曰惟嗜魚故  
不受受魚失祿無以食魚不受魚得祿終身食魚以老  
者智少者決必能治阿子奇年十六齊君使治阿既而君  
悔之遣使追追者反曰子奇必能治阿共載皆白首也子  
奇至阿鑄庫兵以作耕器魏聞童子治邑庫無兵倉無粟  
乃起兵擊之阿人父率子兄率弟以私兵戰遂敗魏師

新序三十卷

原缺

法言十五卷

揚雄撰李軌弘範注

務學不如務求師師者人之模範晞顏之人亦顏之徒  
晞驥之馬亦驥之乘詩人之賦麗以則辭人之賦麗  
以嫵若孔氏之門而用賦則賈誼升堂相如入室矣

四重何謂四重言重則有法行重則有德貌重則有威  
好重則有觀四輕何謂四輕言輕則招憂行輕則招  
辜貌輕則招辱好輕則招嫵刀不利筆不銛宜加砥  
削天可度則覆物淺矣地可測則載物薄矣說天



者莫辯乎易說地者莫辯乎書說禮者莫辯乎詩說理  
者莫辯乎春秋 孔子東國之逐臣夷齊西山之餓夫  
不屈其志不辱其身不夷不惠可否之間 仲尼之道  
猶四瀆經營中國終入大海

太玄經十卷

揚雄撰  
虞翻注

鷹萃于林獺入于泉 鳴鳩在林笑彼衆禽 淮南王  
安多華少實 齊桓晉文之霸如日繼月 孔子文足  
老君玄足 山川數澤萬物歸焉 君子得位則昌失

位則良小人得位則橫失位則喪

新論十七卷

桓譚

三皇以道治五帝以德化三王由仁義五霸用權智無  
制令刑罰謂之皇有制令無刑罰謂之帝賞善誅惡諸  
侯朝事謂之王興兵衆約盟誓謂之伯王者往也言其  
惠澤優游天下歸往也王道純粹其德如彼霸道駁雜  
其功如此俱有天下而君萬民垂統子孫其實一也

圖王不成亦可以伯 治國者輔佐之本其任用咸得

大才大才乃主之股肱羽翮也

明鏡龜策也章程斛

斗也銓衡丈尺也

前世俊士立功垂名圖畫於殿閣

宮省此乃國之大寶亦無價矣雖積和璧累夏璜囊隋  
侯籛夜光未足喻也伊呂良平何世無之但人君不知  
羣臣勿用也 賢有五品謹勅於家事悌順於倫黨鄉

里之士也作健曉惠文史無害縣廷之士也信誠篤行  
廉平公理下務上者州郡之士也通經術名行高能達  
於從政寬和有固守者公輔之士也才高卓絕疎殊於

衆多籌大畧能圖世建功者天下之士也 賈誼不左  
遷失志則文彩不發淮南不貴盛富饒則不能廣聘駿  
士使著文作書太史公不典掌書記則不能條悉古今  
揚雄不貧則不能作立言殷之三仁皆暗於前而章於  
後何益於事何補於君 世有圍碁或言兵法之類上  
者張置踈遠多得道路而勝中者務相遮絕爭便求利  
下者守邊隅趨作望目生於小地猶薛公之言黥布反  
也上計取吳楚廣地道中計塞城皋遮要爭利下計據

長江以臨越守邊隅趨作罍目者也更始將相不防衛  
罍中死碁中生也 文王葬枯骨無益衆庶衆庶悅之  
恩義動人也王翁觀人五藏無損生人生人惡之殘酷  
也 東方朔短辭薄語以為信驗人皆謂朔大智後賢  
莫之及譚曰人有以狐為狸以瑟為瑩篴此非徒不知  
瑟狐又不知狸與瑩篴乃非但言朔亦不知後賢也

夫以人言善我亦必以人言惡我王翁使都尉孟孫往  
泰山告祠道過徐州徐州牧宋仲翁道余才智陳平留

侯之比也。孟孫還喜謂余曰：仲翁盛稱子德，子乃此耶？余應曰：與僕遊四五歲，不吾見稱。今聞仲翁一言而竒怪之，若有人毀余子，亦信之。吾畏子也。余前作王翁掌教，大夫有男子殺母，有詔燔燒其子屍。余謂此事不宜宣布。余封事云：宣帝時，公卿大夫朝會，丞相語次云：梟生子，子長食其母，乃能飛。時有賢者應曰：但聞烏子反哺，其母丞相大慙自悔也。人皆少丞相多彼賢人，賢人之言益於化也。鳥獸尚與之諱，況於人乎？不宜發揚也。

龍無尺木無以昇天聖人無尺土無以王天下 識

出河圖洛書但有兆朕而不可知後人妄復加增依託  
稱是孔丘誤之甚也 張子侯曰揚子雲西道孔子也

乃貧如此吾應曰子雲亦東道孔子也昔仲尼豈獨是  
魯孔子亦齊楚聖人也 畫水鏤冰與時消釋 孔子

以四科教士隨其所喜譬如市肆多列雜物欲置之者  
並至聞東里語云人聞長安樂則出門西向而笑肉味  
美對屠門而嚼此猶時人雖不別聖亦復欣慕 顏淵

所以命短慕孔子殤其年也如庸馬與良駿相追銜尾至暮良馬鳴食如故庸馬垂頭不食何異顏孔優劣

余少時見揚子雲麗文欲繼之嘗作小賦用思大劇立致疾病子雲亦言成帝詔作甘泉賦卒暴遂倦卧五藏出地以手收內之及覺氣病一年由此言之盡思慮傷精神也 莊周病劇弟子對泣之應曰我今死則誰先更百年生則誰後必不得免何貪於須臾 子貢問蘧伯玉曰子何以治國答曰弗治治之 古孝經一卷二



十章一千八百七十二字今異者四百餘字 左氏云  
經與傳猶衣表裏相待而成 堯能則天者貴其能臣  
舜禹二聖 劉子政子駿駿兄弟子伯玉俱是通人尤  
重左氏教授子孫下至婦女無不讀誦此亦蔽也 舉  
網以綱千目皆張振裘持領萬毛自整治大國者亦當  
如此 以賢伐賢謂之煩以不肖謂之亂 王平仲云  
周譜言定王五年河徙故道今所行處非禹所穿 揚  
子雲工於賦王君大習兵器余欲從二子學子雲曰能

讀千賦則善賦君大曰能觀千劍則曉劍嘖曰伏習象  
神巧者不過習者之門 五福壽富貴安樂子孫衆多

百足之蟲共舉一身安得不濟 曲陽侯迎方士西

門君惠從其學却老之術君惠曰龜稱三千歲鶴言千  
歲以人之材何乃不及蟲鳥耶余應曰誰當久與龜鶴  
同居而知其年歲耳 聖人何不學仙而令死耶聖人  
皆形解仙去言死者示民有終也 昔神農伏羲王天  
下梧桐作琴三尺六寸有六分象暮之數厚寸有八象

三六數廣六寸象六律上圓而斂法天下方而平法地上廣下狹法尊卑之禮琴者禁也古者聖賢玩琴以養心窮則獨善其身而不失其操故謂之操達則兼善天下無不通暢故謂之暢堯暢經逸不存舜操其聲清以微微子操其聲清以淳箕子操其聲淳以激

論衡二十七卷

王充

操行有常賢仕宦無常遇賢不賢才也遇不遇時也才高行潔不可保以必貴能薄操濁不可保以必賤或同

操而異主伊尹箕子是也二人俱命世之臣伊尹遇成湯作相箕子遇商紂作奴故知遇與不遇也 清受塵

白受垢青蠅所汙常在練素 邑犬羣吠吠所怪也

絃者思折伯牙之指御者願斷王良之手惡彼勝已也玉變作石石化作礫毀謗使然也採玉者破石取玉選士者棄惡取善命不勉也智者歸之於天 取富貴若

鑿溝伐薪鑿不休則溝深斧不止則薪多亦有溝未成而遇湛薪未多而逢火樂貧勝禍勉已勤事以致富砥

才明操以取貴農夫力耕得穀多商賈遠行得利深命  
富之人筋力自強命貴之人才智自高若千里馬氣力  
自勁頭目蹄足自相副 魯城門朽頤欲頽孔子疾行  
而過之左右曰如此久矣孔子曰吾惡其久也脫遇壞  
則不幸 蟲墮一器酒棄不飲鼠殘一筐飯損不食

墨家云人死無命儒家云人死有命歷陽之郡一宿化  
成湖白起坑趙卒四十萬衆此並有命耶言命者曰命  
當溺死故相聚於歷陽命當壓死故相聚於平原沛公

初起相攻人入豐沛之市云多封侯人也人命繫於國  
物命繫於人 齊人舒緩秦人慢易楚人促急燕人戇  
敢四國之民更相出入 張次公娶隣巫女卜工曰女

相當貴公後位至丞相乃是次公亦貴遂與女相合也  
世謂宅有吉凶徙有歲月余謂天道難知假令有觸  
犯者命吉凶之人也按相黥布當先刑而後王衛青當  
封亞夫而餓死鄧通當貧餓此骨節皮膚各異也 文  
王在母腹中便有四乳非長大修道德乃生也后稷作

兒以種樹而戲孔子能行以俎豆而弄石生而堅蘭生而香生稟善氣長大乃成就也 蚊蟲不如牛馬之力

牛馬困於蚊蟲有勢也十圍之牛為牧豎所驅數仞之象為越僮所鉤無便也 孔子吹律自知殷後項羽重

瞳虞舜苗裔聖人自有種族堯與高祖安得是龍子也

宋景公有三善言獲二十一年燕丹執子秦天雨粟馬生角杞梁妻哭城崩湯旱剪髮作牲致雨南陽卓公作緱氏令蝗蟲不入境孫叔敖埋兩頭蛇有陰德已上

並云虛也龍若遁逃在樹中為天所敗則非神也若必有神則不應有龍肝豹胎故立知水火相薄作雷龍聞雷聲即起武王伐紂兵不血刃虛言也晨舉脂燭血流漂杵何謂不血刃耶漢誅王莽軍至漸臺血流沒趾用天下兵未有不血刃也 紂糟丘酒池牛飲者三千人長夜之飲亡其甲子車行酒騎行鬻百二十日作一月按紂或是覆酒滂沲於地因名作池釀酒積糟因名作丘以酒作池以車行酒以肉懸林因謂騎行炙男女裸



而逐林中奔走侍者惡之故言三千人實非也

町町

若荆軻之間言秦王誅軻九族夷其一里一里皆滅故  
曰町町按秦雖無道不應盡誅軻里也始皇幸梁山宮  
見李斯車騎盛出怪之左右私告李斯斯損車騎始皇  
不知左右誰告止殺在傍荆軻之里必不盡誅之魯  
班刻木鳶飛三日不下為母作木車木人御之機關之  
發去而不還此恐不實 孔子遊說七十餘國按孔子  
自衛反魯在陳絕糧削跡於衛伐樹於宋不過十國

子羔泣血三年未嘗見齒言其不笑語豈得不見齒耶  
禽息碎首薦百里奚於秦繆公恐是叩頭流血謂之碎  
首 祖伊諫紂云天下之人無不欲王亡者此增益也  
恐紂不懼耳若天下皆願紂亡即當時瓦解不應與周  
戰血流漂杵也 子謂子貢曰汝與回也孰愈子貢曰  
回也聞一以知十按孔子知顏淵愈子貢則不須問問  
則子貢何敢言勝孔子意者恐子貢凌顏淵故此問以  
抑之 鯉也死有棺而無槨其時作大夫乘三馬何不

截而貨之作槨也作士之時乘二馬截一以賻舊館舊  
館不賻未亂制葬子無槨實非法何重舊人之恩乃輕  
父子之禮不貨車以葬子豈不以貪官仕乎 伯夷叔  
齊為庶兄奪國餓死首陽山非讓國與庶兄也豈得稱  
賢人乎共工與顓頊爭天下不勝怒而觸不周山天柱  
折地維絕女媧鍊五色石以補蒼天斷鼇足以立四極  
按共工有力折山戰何不勝女媧能以石補天天審是  
玉石耶天本以山作柱鼇足何能柱之鼇必長大則女

媧不能殺之必被其所殺何能補天天門在北地戶在東方地最下者揚究二州洪水之時二土最被水害天有日月星辰謂之文地有山川陵谷謂之理地理上向天文下向天地合氣而萬物生焉天地夫婦也天南方高北方下日出高故見日入下故不見天之形若倚蓋蓋倚地則不能運懸之樹然後能運日不入地譬人把火夜行平地去人十里則不見非滅也日亦如此雲霧雨雪皆由地發不自天降夏則作霧冬則作霜溫則作

雨寒則作雪 才能之士隨世驅馳節操之人守隘逆  
竄驅馳日以巧逆竄日以拙非才智不及狎習異也齊  
郡世刺繡恒女無不能者襄邑能織錦恒女無不巧者  
目見而手狎也 朝廷之人幼稱幹吏者以朝廷作田  
畝以刀筆作耒耜以文書作農桑猶家人子弟生長狎  
習具知曲折愈於賓客雖孔墨之才不能分別 手中  
無錢而欲市貨貨主死不與之胷中無學而欲求仕猶  
無錢市貨不可得也 知古不知今謂之陸沈知今不

知古謂之盲瞽見驥足不異衆馬之蹄躡平陸而馳千里方可知也 有人於此其智如源其德如山力不能自舉須人舉之人莫之舉竄於閭巷無由達矣器空無食飢者不顧胃虛無懷朝廷不御 蘭臺之史班固賈逵揚雄傅毅之徒名芳文美無大用也夫能說一經者儒生博覽古今者通人採掇書傳能奏記者文人能精思著文結連篇章者鴻儒若劉子政父子揚子雲桓君山之徒猶文武周公並出一時班叔皮續太史公書百

篇已上紀事詳悉讀者以謂甲子以太史公作乙子孟  
堅文比叔皮非徒五百里也 龜三百歲大如錢著七  
十歲生一莖此神物故生遲生亦長久賢儒在世猶靈  
著神龜也楓桐之樹生而速長故其皮肥不能堅檀欒  
後榮強勁可作車軸 湍瀨迴沙轉石而大石不動者  
是石重而沙輕大儒俗吏同在世有如此也 上天之  
心在聖人之肖其譴告在聖人之口世無聖人安能知  
天 人在天地之間如蚤蝨在衣裳之內若蟻螻於巢

穴之中 正朝占四方風從南來旱從北來湛從東來  
疫從西來兵 秦將滅都門崩霍光將敗茅牆亦壞杞  
梁之妻崩城何也 亡獵犬於山林大呼犬名則號呼  
而應人犬異類而相應者識其主也 東風至酒湛溢  
按酒味從酸東方木其味酸故酒湛溢 將有赦獄鑰  
動感應也 蠶合絲而商絃易新穀登而舊穀缺人子  
生而父母氣衰 亂龍者亂有終也劉子政董仲舒說  
龍不盡論衡終之故曰亂龍 釣者刻木作魚丹漆其



身迎水浮之起水動作魚謂之真並來會聚土龍之事  
何得不能致雨 少政卯在魯與孔子並孔子之門三  
盈三虛唯顏淵不去知孔子聖也 屈軼生於庭見佞  
人則指必若如此舜何用令臯陶陳知人之術 堯湯  
水旱豈二聖政所致也天理歷數自然耳猶慈父治家  
亦不能使子孫皆孝也 瑯琊子明兄曾為饑人欲食  
弟自縛叩頭代兄饑人善其義皆舍之後兄卒養其孤  
遇歲凶饑殺已子活兄之子臨淮許君升亦餓殺已子

全兄之孤 人貴鵠賤鷄者謂鵠遠而鷄近也畫工好  
畫上古之人不畫秦漢之士者重古也揚雄作太玄法  
言張伯松不肯一觀與其人並肩故賤其言也若揚子  
雲生周金匱矣 武王伐紂太公陰謀食小兒以丹令  
身赤長教言殷亡殷亡殷人見兒身赤謂是天神又言  
殷亡謂其必亡周人諱其事 古之帝王建鴻德者須  
鴻筆之臣褒頌紀德也龍無雲雨不能參天鴻筆之人  
國之雲雨文章載人之行傳人之美豈徒調弄筆墨空

馭英麗哉 人生者精氣也能作精氣者血脉也人死血脉竭精氣亡骨肉化灰土何能作鬼耶若言死者無知聖人恐開不孝之門故不言死者無知其實無知也

諱舉五月子言不利父母按田文不害田嬰 礪刃

井上恐墜井中又刀邊井刑字礪刀井上恐被刑人意也 無偃寢象尸也 無似著相受不固也 子日沐

令人愛卯日沐令人白頭愛憎白黑不由沐耳使嫗母子日沐人能愛乎使十五童子卯日沐能令白髮乎

子路見孔子豬肩牛腩可以得兆何必著龜孔子曰著者者也龜者舊也狐疑之事當問耆舊耆龜者未可神也取其名耳武王伐紂卜筮大凶太公推著蹈龜曰枯骨死草何能知吉凶乎 商家門不宜向南徵家門不宜向北堂盡南向何不擇也 聖人前知千歲後知萬世孔子將死遺書曰有一男子自云秦皇上我之牀顛倒我衣裳至沙丘而亡後秦皇果至沙丘而亡孔子又云董仲舒亂我書後仲舒論春秋傳記又云亡秦者胡

後胡亥亡秦此孔子後知萬世也吹律自知殷後此孔子前知千歲也唐者蕩蕩也民無得而名焉虞者樂也夏者大也殷中也周至也志有所存顧不見泰山知屋漏者在宇下知政安者在草野知經誤者在諸子論衡者銓輕重立真偽非苟論文飾奇麗所以弘世俗也王充會稽上虞人字仲任王充書形露易觀文語不與俗通石多玉寡寡者為珍龍少魚衆少者為神人有難充書繁重如此充答云文衆勝寡財富愈貧世無

一引吾有百篇人無一字吾有萬言孰者可貴充章和二年徙家避難歷年寢廢年漸七十時可懸輿髮白齒落儔倫彌素貧無供養志不虞快乃作養性書六十篇

正論五卷

崔元始

見信之臣括囊守祿疎遠之臣言以賤廢是以王綱縱弛於上智士伊鬱於下夫君政陵遲如乘弊車若能求巧工使葺理之折則接之緩則楔之可復新矣世主莫不願得尼軻以輔佐及得之未必珍也夫貞一之

士不曲道以媚時不詭行以邀名恥鄉原之譽絕比周之黨必待題其面曰魯仲尼鄒孟軻不可得也命世之士常抑於當時無不見思於後日以往揆來亦何容易圖王不成弊猶足霸圖霸不成弊將如何農桑勤而利薄工商逸而利厚故農夫輟耒而彫鏤女工投杼而刺繡上行下效然謂之教陳兵策於安平之世譬令未病者服藥昔人有慕讓財之名推田業與弟俄而貧乏反以威力就弟強貸此不當也舉彌天之網以

羅海內之士同類翕集而蛾附計士頻蹶而脅從黨成  
於下君孤於上 馬不素養難以追遠士不素簡難以  
趨急 葉公之好攘羊雖可發姦君子不貴也 國不  
信道工不信度亡可待也 無賞罰之君而欲世治猶  
不著梳櫛而求髮治不可得也 術家曰冬榮者春必  
殺里語曰州郡記如霹靂得詔書但掛壁 洗濯民心  
湔浣浮俗

潜夫論十卷

王符字  
節信



仁義不能月昇財帛而欲日增余所惡也一犬吠形百  
犬吠聲世之疾此固已矣 嬰兒有常病貴臣有常禍  
父母有常失人君有常過嬰兒病飽貴臣傷寵父母失  
於媚子人君過於驕臣 十步之間必有茂草十室之  
邑必有俊士攻玉以石治金以鹽濯錦以魚濯布以灰  
夫物固有醜治好也君之明者兼聽所暗者信南面之  
大務莫急於知賢知賢之近塗莫若於考功 諺曰曲  
木惡直繩重罰惡明政 欲知人將病不嗜食欲知國


將亡不嗜賢也病非無嘉饌病不能食至於死國非無  
賢人君不能用故速亡理世不得真賢猶治病不得真  
藥治病當得真人參反得蘿服服之增劇非藥無效也

先世欲赦先遣馬分行市里聽乎路隅咸云當赦是  
謂天赦遂乃施行 孝明帝嘗問曰今旦何故無上書  
者左右曰為反支日也帝曰民庶遠來詣闕不可奪其  
日使受章者無避反支此明王為民愛日也聖王之政  
普覆兼愛不私近密不忽疎遠吉凶福禍與民同之排

簾障風探沙擁河無益於事徙自弊耳猶不命大將掃  
除醜虜而州縣興兵不息也 扁鵲治病審閉結而通  
鬱滯虛者補之實者瀉之猶邊境犬羊不可久荒以開  
敵心 一宅同姓相代或吉或凶一官同姓相代或遷  
或免成康居之而興幽厲居之而衰吉凶興衰在人  
不由宅矣師曠曰赤色不壽姓大者易滅姓或有因官因  
號因居因地者司馬司徒中行下軍因官也東門西都  
南宮北郭因居也三鳥五鹿青牛白馬因地也 季勝

造父以善御事周穆王遊西海忘歸徐偃作亂造父王  
御者日行千里以征之王封造父於趙因以得氏昆  
弟世疎朋友世親此人情也富貴人爭附之貧賤人爭  
去之與富貴交者上有稱舉之用下有貨財之益與貧  
賤交者大有賑貸之費小有假借之損夫官人有跖  
之惡結駟而過士以謂榮况實有益乎處子有顏閔之  
賢被褐造門人以謂辱况實有損乎故富貴易為客貧  
賤難得適好服謂之奢僭惡衣謂之困阨徐行謂之飢

餒疾行謂之逃責不候謂之倨傲數來謂之求食空造  
以謂無意奉贄以謂欲貸恭謙以謂不肖抗陽以謂不  
德此處子貧賤之苦酷也凡今之人言方行圓口正心  
邪君上治世先其本後其末慎其心治其行則姦慝不  
生古訓著三皇五帝多以伏羲神農二皇其一或云  
燧人或云女媧我又聞古有天皇地皇人皇未可知也



意林卷三

欽定四庫全書

子部

意林卷

五四

詳校官中書<sub>臣</sub>潘有為

員外郎<sub>臣</sub>牛稔文覆勘

總校官編修<sub>臣</sub>王燕緒

校對官編修<sub>臣</sub>錢世錫

謄錄監生<sub>臣</sub>錢延鵬

欽定四庫全書

意林卷四

風俗通三十一卷

應劭

唐 馬總 撰

序云風者天氣有寒煖地形有險易水泉有美惡草木有剛柔俗者含血之類象之而生百里不同風千里不同俗周秦常以八月遣輜軒使者採異代方言藏之祕府及嬴氏之亡遺棄殆盡蜀人嚴君平有千餘言林間



翁孺才者有梗槩與揚雄注云續二十七年凡九千字

張竦云懸諸日月不刊之書余雖不才敢比隆於斯

人神農者神信也農濃也其德濃厚若神五帝黃帝顓  
頊帝嚳堯舜也黃光也顓專也頊信也嚳考也堯高也  
舜推也修也言推德行修堯之緒三王禮號謚云夏禹  
殷湯周武王禹輔也湯昌也王往也言天下所歸往五  
伯春秋云齊桓晉文秦繆宋襄楚莊伯者白也長也言  
其咸建五長功實明白霸者把也言其把持天下之政

按秦昭王太后始臨朝也牧守長不宜數易按尚書  
有考績孔子曰如有用我者期月而已三年有成鄭子  
產從政三年民乃歌之賢聖尚須漸進況中才乎數易  
豈不紛錯道路也 古制本無奴婢奴婢皆是犯事者  
奴者劣婢者卑陋 里語云取官漫漫怨死者半昔在

清平之世使明恕君子哀矜折獄尚有怨言況在今時

耶

應劭三國時  
人此當時語

光武車駕徙都洛陽載素簡紙經凡

二千兩董卓盪覆王室天子西移中外倉卒所載書七

十車於道遇雨分半投棄卓又燒燭觀閣經籍盡作灰  
燼所有餘者或作囊帳先王之道幾烟滅矣 俗說有  
功得賜金者皆黃金也按孫子兵書日費千金千金百  
萬錢也陳平間楚千金贈二疏金五十斤並黃金也或  
云一金亦是一萬錢也 不養併生三子俗說似六畜  
妨父母按春秋國語越王時民生二子與之飢生三子  
與之乳母遂滅強吳何害之有 不舉父同月子俗云  
妨父按左傳魯桓公子與父同月因名子同生漢明帝

亦與光武同月生 不宜歸生俗云令人衰按人婦好  
以女易他男故不許歸 封泰山俗說岱宗上有金篋  
玉策能知人年壽修短武帝探得十八因倒讀之曰八  
十按岱宗封者立石高一丈二尺刻之曰事天以禮立  
身以義事父以孝成名以仁四方之內莫不師服刻石  
紀號著功績也其時武帝已年三十七因何更得十八  
若言倒讀神無福矣余承乏東嶽忝素六載數經祈祀  
咨問長老更上泰山者云無金篋玉牒探壽之事 東

方朔是太白精黃帝時作風后堯時作務成子後又生  
於越在越作范蠡在齊作鴟夷子言其變化無常也按  
朔滑稽之雄俗人因以怪語附之安得神耶 彭城相  
袁元服父伯楚作光祿卿於服中生子自謂年長不孝  
莫大於無後故收舉之君子不隱其過因以服作字按  
元服名賀母汝南人祖名京作侍中安帝時生元服百  
官來賀垂老而孫兒生喜其嘉會因名作賀字元服服  
父伯楚歷典三郡早喪妻不肯娶臨終勅子便留葬無

取汝母喪柩若亡者有知往來不難若無知只為煩耳  
清高若此豈有服中生子而名作賀 汝南王叔漢父  
子方出遊二十餘年不還叔漢作尚書郎有人告子方  
死於汝南即遣兄伯三往迎喪叔漢即發哀詔書賻錢  
二十萬既而子方從蒼梧還叔漢詣闕乞納賻錢受虛  
妄罪靈帝詔將相大夫會議之博士任敏議云凡人中  
壽七十視父同儕亡可製服也子方在遠人指其處不  
可驗也罪不可加焉詔書還錢復本官 汝南張妙會

杜士士家娶婦酒後相戲張妙縛杜士捶二十又懸足  
指士遂致死鮑昱決事云酒後相戲原其本心無賊害  
之意宜減死也 汝南周翁仲婦產一女會屠者妻產

一男翁仲妻密以錢易屠者之男後翁仲作北海相使  
見鬼主簿周光與兒同祭先塋主簿回謂翁仲曰祭所  
但見屠兒弊衣繼縷持刀割肉別有人帶青綬仿徨東  
廂不進何也翁仲乃持劔問妻妻具陳其事翁仲曰凡  
有子者欲承先祖先祖不享何用遂以車馬送還屠家

乃迎其女女已嫁賣餅人取歸適安平李文思文思官  
至南陽太守神不歆非類明矣豈得養他人子乎 陳  
留有富翁年九十無男娶田舍女一宿身死後產一男  
至長女曰我父娶一宿身亡此子非父之子遂爭財數  
年不決丞相丙吉決云老翁兒無影不耐寒其時八月  
中取同歲小兒俱解衣試之老翁兒獨呼寒日中行果  
然無影遂以財與之 潁川有兄弟同居兩婦俱懷妊  
長婦數月胎傷不言知產期至俱卧產房候弟婦產得



一男夜盜之因爭三年不決丞相黃霸殿前令以兒去  
兩母各十步叱兩婦令爭取之長婦把持甚急兒大啼  
弟婦恐傷放之長婦色喜弟婦愴然霸曰此弟婦子也  
即劾長婦果然伏罪 臨淮有一人持一疋縑到市賣  
之遇雨披之後有一人求庇廕一頭之地雨霽共爭之  
丞相薛宣決曰縑直數百何用紛紛遂中斷各與半續  
察之縑主稱冤不已後人有喜色宣知其情考而伏之  
周公樂曰勺勺者斟酌先祖之道武王樂曰武武功

定天下也舜樂曰韶韶者紹堯也堯樂曰大章章者彰也帝嚳樂曰五英英者華也劉向云商章也物成就可章度也角觸也物觸地載芒角而生也宮者中也徵者祉也物盛大而繁祉羽者宇也物聚藏宇覆之聞宮聲使人溫潤而廣大聞商聲使人方正而好義聞角聲使人齊整而好禮聞徵聲使人隱惻而博愛聞羽聲使人善養而好問 琵琶近世樂家所作不知誰也以手琵琶因以得名長三尺五寸法天地人與五行也四絃象

四時 易云利見大人 大人與聖人其義一也 論語

云君子上達 臧孫紇曰後有達者將在孔丘乎 儒者區也 別古今賢愚 章帝時以賈逵曰通儒 時人語曰問事不休 賈長頭禮云羣居五人長者必異席 今呼權貴作長者非也 管子云先生施教 弟子則之 非知古之道

是師者之稱 諸生弟子學者非一故曰諸先生者當如醒學者譬如醉言生俱醉獨有醒者 祭酒禮云飲酒必祭尊其先也 孫卿在齊最是師老故三稱祭酒 士

詩云殷士膚敏髦士俊秀雅士博達列士有不易之分  
處士隱居放言易云師貞丈人吉非徒尊老須德行先  
人也傳云杖德莫如信者其恩德可信杖也 禮云十  
尺曰丈成人之長也夫者膚也言其智膚敏弘教也故  
曰丈夫 論語云匹夫匹婦傳云一晝一夜成一日一  
男一女成一室按古人男女作衣用二疋今人單衣故  
言疋 夫人當龍變起不繫鄉里若止繫風俗見善不  
徙故謂之俗人 禮言簡不肖按生子鄙陋不似父母

曰不肖今人謙辭亦曰不肖 方言人不事事而放蕩  
謂之無賴不可恃賴也猶高祖謂太上皇云大人以臣  
無賴也 司徒中山祝恬字伯休公車徵在道得溫疾  
過友人謝著著拒不受至汲郡止客舍舍六七日諸生  
見恬轉劇欲告汲令恬曰友人尚不相容汲令不相識  
告之何益死生命也不須醫藥諸生潛告汲令令即汝  
南應融聞之大驚至疾所泣曰伯休不世英才當作國  
家幹輔何乃默止客舍不遣人知融遂躬御而歸親自

侍疾疾漸損融謂伯休曰吉凶不諱憂怖交心已備凶  
具對之悲喜伯休停傳舍數十日遂去拜侍中尚書令  
又拜司隸薦融自代歷典五郡謝著不為公府所取

上古之時草居霜宿冬則山南夏則山北 彭城孝廉

張子矯議云若君臣不得相襲作名周穆王諱滿至定  
王時有王孫滿厲王諱胡莊王之子名胡 俗云五月

到官至免不遷今年有茂才除蕭令五月到官破日日  
入舍視事五月四府所表遷武陵令余為營陵令正觸

太歲主簿令余東北上余不從在事五月遷太山守

楚辭云風伯飛廉也按周禮祀風師箕星也主簸揚能致風氣戊戌之神作風伯故丙戌日祀於西北按周

禮雨師畢星也土中之衆莫若水故雨稱師丑之神作雨師故巳丑日祀之桓帝元嘉中京婦女作愁眉啼

粧墜馬髻折腰步齟齬笑愁眉者細而折啼粧者薄拭眼下似啼痕墜馬髻側在一邊折腰步足不在體齟齬笑若齒痛此事並出梁冀傳曰趙王好大眉人間皆半

額齊王好廣領國人皆沒項楚王好細腰後宮有餓死者京師有胡服胡帳胡牀胡瑩篴胡笛胡舞按董卓時兵填塞是也 靈帝宮中遊西園駕四白駝躬自操轡

公卿倣效價與馬齊 桓帝世謠言直如絃死道邊曲

如鉤反封侯梁冀欲樹幼主李固欲立清河王梁冀遂奏李固死於獄中曝屍路邊如鉤梁冀如絃李固 千

里草何青青十日卜不得一日生此董卓字也青青暴

盛貌 秦漢以來尊者號作宮室已前貴賤無別 按



世本鮐作城郭城盛也郭大也

按天子有外屏令臣

下屏氣息

苑苑蘊也薪蒸之所蘊積

孫子云金城

湯池而無粟者太公墨翟不能守之郡者羣也左傳云

上大夫受縣下大夫受郡至始皇方以郡監縣縣平也

傳舍按使者傳言乃得舍於傳也

南北曰阡東西

曰陌按易傳上古有恙由善與人作患

故人平居曰無恙

城

門失火禍及池魚俗說池與魚人姓字居近城門也按

城門失火取池水故魚皆死

獄自三王制肉刑始有

獄夏曰下臺周曰圜圜令人思讐改惡獄字二犬守言  
無情狀犬亦得之囚罪人置諸圓土故囚字從口中人  
罪字本從自辛苦憂之秦皇謂臯字似皇故改作罪

會稽多淫祀家貧不得牛祀者死作牛鳴太守第五倫  
嚴科絕之桂陽太守李叔堅少時作州從事家有狗

作人立叔堅曰此狗喻人行何害叔堅作縣令解冠  
榻上狗戴之而走叔堅曰此狗誤觸冠纓冠纓挂其耳  
矣犬復與人竈前畜火隣里告之叔堅曰狗能畜火幸

不煩人犬遂暴死叔堅至大位

商君書四卷

夫有高人之行見非於世有獨知之明見怨於人螟螣  
春生秋死一出而民數年乏食今一人耕百人食有甚  
於螟螣矣 農者少而遊食衆遊食者衆則農怠農怠  
則治荒以強去弱者弱以弱去強者強 上世之士衣  
不暖膚食不滿腹苦其心意勞其四支 古者民叢生  
而羣處亂乃立君 蠹衆則木折隙大則墻壞不勝而

生不敗而亡自古及今未嘗有也 使見戰者如餓狼  
之見肉則可用矣 聖人制民也如高下制水如燥濕  
制火

阮子四卷

漁人張網於淵以制吞舟之魚明主張法於天下以制  
強梁之人立法以隄民百姓不能干立防以隄水江河  
不能犯防而可犯則江河成灾法而可干則百姓成害  
不樹者死無棺不蠶者身無帛不績者凶無纓君子

暇豫則思義小人暇豫則思邪 高鳥相木而集智士  
擇土而翔 一盜不誅害在穿窬修譽不誅害在詞主

正部十卷

凡人矇矇冥冥學以啟志行以處身進於道則成君子  
非於禮則曰小人君子之舉履德而榮光小人之動陷  
惡而傷刑 皎皎練練得藍則青得丹則赤得蘖則黃  
得涅則黑 玉不琢則南山之圓石穿窬之徒不避腰  
領奔北之士不憚斧鉞 漢家窮天涯究地圻左湯谷

右虞淵前炎楚後塞門祁連以北黃山以南碣石以東  
合黎以西莫不襁負來貢 仲尼叙書上謂天談下謂  
民語兼該男女究其表裏 淮南浮偽而多恢太玄幽  
虛而少效法言雜錯而無主新書繁文而鮮用 玉符  
云赤如鷄冠黃如蒸栗白如脂肪黑如淳漆此玉之符  
也言成雅訓辭作典謨此人之符也 山神曰螭物精

曰魅土精曰獐羊水精曰罔象木精曰畢方火精曰遊  
光金精曰清明天下有道則衆精潛藏 天以仙人曰

子衆人曰芻狗愛其子私其壽賤芻狗聽其夭若不學  
譬如無目而視無脛而走無翅而飛無口而語不可得  
也 桀紂雖有天子之位而無一人之譽猶朽株枯樹  
逢風則仆 明刑審法憐民惠下生者不怨死者不恨  
諺曰政如冰霜姦宄消亡威如雷霆寇賊不生

士緯十卷

姚信

孔文舉金性太多木性不足背陰向陽雄倬孤立 絲俱  
生於蠶銅等出於石作繒則賤作錦則貴鑄鈴則小鑄

鐘則大 經漸車之水厯繞輪之沙趾跡高下不可論  
凡水溫則成湯寒則成冰水湯異氣而水性猶同蠶能  
投練匪湯不綿人性推移蓋此比也琴瑟張而鄭衛作  
五色成而綺縠生 孟軻驅世事於仁義之域行者步  
中正之塗若使南海無採珠之氏崑山無破玉之工則  
明珠不御於椒室美玉不佩於桂宮

通語八卷

輪者車之跡櫂者舟之羽身之須道如此二物毀彼者



雷同而鳴噪稱此者火燎而波駭或問陳蕃忠乎答云  
單車作討賊之斧直階非亂世之資知其忠不知其智  
也才貴精學貴講質勝文石建文勝質蔡邕文質彬  
彬徐幹庶幾也

抱朴子四十卷

外篇二十卷內篇二  
十卷葛洪字稚川

清醪芳醴亂性者也紅華素質伐命者也班狄不能

削石作芒針歐冶不能鑄鉛錫作干將漢中起居注

云李少君欲去武帝夢與同登嵩山半道有使者乘龍

持節從雲中來云太一請少君帝曰少君將舍我去矣  
數日而少君死久之發省唯衣冠在焉以蟻鼻之缺  
捐無價之淳鈎分寸之瑕棄盈尺之夜光朱公所以鬱  
邑薛燭所以永歎猶人不學仙也道術乃令變形易貌  
吞刀吐火坐在立亡興雲起霧召致蛇蟲聚合魚鼈入  
淵不溺蹴刃不傷陳仲弓異聞記云同郡人張廣遭  
亂有女四歲不能行棄冢中以數月糧與之後三年乃  
還欲收葬之女猶坐冢中問其故女曰糧盡以後見冢

角有一物申頸吞氣乃效之轉不復飢尋者乃大龜也  
將女還食食飲初小腹痛久乃習之 湯師蜘蛛而結網

金天據九扈以正時唐堯見蓂莢而知月 道能登虛

躡影飲玉醴食翠芝 彭祖云天上多尊官新仙者位

卑奉事非一也 農夫得彤弓以驅烏南城得袞衣以

負薪猶世人得仙丹而不貴也 元君老君師也 世

人唯競飛蒼走黃依榮逐利 上士得道成天官中士

得道棲集崑崙下士得道長生世間 朱草莖如珊瑚

刻之汁流如血以玉投汁中丸之如泥久即成水以金  
投之曰金漿以玉投之曰玉醴服之長生 石先生丹  
法取烏未生毛者以真丹和牛肉飴之長毛羽赤色煞  
陰乾服之壽五百歲 素顏紅膚惑其目清商流徵亂  
其聽此真理之德也 龍淵以靡豁常新斧斤以日用  
速弊 寸蛭泛濫跡水之中則謂天下無四海之廣芒  
蜎宛轉果核之內則謂天下無八極之大漏脯救飢  
酒止渴非不暫飽死亦及之 貴明珠而賤淵潭愛和

壁而惡荆山不知淵潭是明珠所出荆山是和璧所生  
方今士有待次之滯官無暫曠之職景風起則裘鑪  
息世道夷則奇士退 肉芝是萬歲蟾蜍頭上有丹書  
八字五月五日中時取之以足畫地則水流帶之左手  
則辟兵 行山中見小兒乘車馬長七八寸者肉芝也  
服之得仙 千歲蝙蝠白如雪住則倒懸腦重故也

千歲燕窠門向北 雲英雲珠雲液雲母雲沙服之用  
玉水 成帝獵於終南山見一人無衣身生黑毛合圍

取之絕坑踰岸有如飛鳥及得是婦人自云秦時宮人  
關東賊至秦王出降驚走入山垂當飢死有老翁令食  
松實遂不復飢乃是秦王子嬰宮人至成帝二百許歲  
人將還以穀食之毛稍脫落轉老而死 欲長生服山  
精山精术也 陵陽子仲服遠志二十年有子三十七  
人讀書不忘 得聖人是黃老世聖是周孔二人 善  
園基者謂之基聖故嚴子卿馬綏明有基聖人之名  
彭祖自譽佐堯歷夏至殷殷王遣宮女受房中之術有

驗乃欲殺之以絕其法彭祖知之乃逃七十年有人見  
于流沙 欲得長生腹中清欲得不死腹無屎 里語  
云人在世間日失一日如牽牛羊詣屠所每進一步去  
死轉近 老君姓李名聃字伯陽長九尺黃色鳥喙隆  
鼻眉五寸住金樓玉堂 雞舌香黃連乳汁治目中百  
病 諺曰無肥仙人富道士雖能作金銀皆自貧 諺  
曰書三寫魚成魯帝成虎亦如神符今用少驗 白石  
似玉姦佞似賢鸞不掛網麟不墮筭 寸膠不能治黃

河之濁尺水不能却蕭丘之熱穿舟以息漏猛爨以止沸不可得也 若使素士行耕以餬口夜薪火以修業則游夏不足多矣 大厦既燒取水於滄海洪潦凌空伐舟於長川則不及矣 臣猶手足履冰執熱不得辭焉 高巖將隕非細縷所綴龍門沸騰非掬壤所遏劒戟不長於縫緝可以剗割牛馬錐鑽不可剗割牛馬而長於縫緝材有大小不可棄也六軍如林未必皆勇仁者政之脂粉刑者世之轡策當殺不殺大賊乃發



鑽端之火口水可滅鵠卵未乳指掌可糜及其乘衝颺  
燎巨野奮六翮凌朝霞雖智勇不能制也委轡筴而乘  
奔馬於險途捨柁櫓而泛輕舟於江海豈不險哉金舟  
不能凌陽侯之波玉馬不任騁千里之跡 或輸自售

之寶或賣要人之書或父兄貴顯望門而辟命或低頭  
屈膝積習而見收 語曰舉秀才不知書察孝廉父別  
居寒素清白濁如泥高第良將怯如黽諺曰古人欲達  
勤讀書經今世圖官免治生 余謂朋友之交不宜浮

離面而不心揚雄所譏明鏡舉則傾冠見義和照則曲  
影覺周勃社稷之臣不能答錢穀之數 識珍者必拾

濁水之明珠賞氣者必將穢藪之芳蕙自非懸鑑誰能  
披泥抽淪玉澄川掇沈珠智大者盤桓以山峙器小者  
蓬飛而萍浮直繩枉木之所憎清公姦慝之所讐 文

王之接呂望桑陰未移而知其可師矣玄德之見孔明  
晷景未改而腹心以委矣貌望豐偉者不必賢形氣尪  
狎者不必愚 伯喈識絕音之器於烟燼之餘平子別

逸響之竹於未用之前威儀如龍虎盤旋成規矩酒後  
體輕耳熱冠脫帶解遲重者蓬轉而波偃整肅者鹿勇  
而魚躍口訥者皆搖掌以譖聲不競者皆裨膽而高發  
以九折同蟻封以吕梁同牛跡禁之彌極不可向也君  
若畏酒如畏疾憎醉如憎大病則無荒沈之咎矣民有  
穴地而釀酒囊懷酒者法輕利重安能令絕乎管輅頓  
仰三斗而清辯綺粲揚雄酒不離口而太玄乃就慕惡  
者如宵蟲之赴明燭學惡者如輕埃之應颺風 有斧

無柯無如之何 以傾倚屈申者妍媚以風格端嚴者

田舍豈不惑也 窮巷諸生吟誦而向枯簡匍匐而守

黃卷低眉屈膝趨事豪貴毛成翼長蟬脫泉壤自乃軒

昂此鄙俗之徒也 昔西施以心痛卧於道側蘭麝芬

芳人皆美之隣女慕焉人皆憎之猶世人效戴叔鸞阮

嗣宗也逢世所貴則蹇驢蒙龍駿之價 狐白不可以

當暑龍艘不可以乘陸 夫良將剛則法天可望而不

可干柔則象淵可觀而不可入去如收電可見而不可

追住如丘山可觀而不可動 春以長矛在前夏以大戟在前秋以弓弩在前冬以刀盾在前此行軍四時應天法也 太公云從孤擊虛萬人無餘一女子當百丈夫 風鳴葉者賊在十里鳴條者百里搖枝者四百里金器自鳴及焦器鳴者軍疲也氣如驚鹿敗軍氣也

雨露濡衣裳者謂潤兵不濡衣裳者謂泣軍軍兵太一玉帳之中不可攻也 兵地生蟹者宜速移 余嘗問

嵇生曰左太冲張茂先可謂通人乎君道答曰通人者

聖人之次也其間無所復容余問班班云呂氏望雲而知高祖所在天豈獨開呂氏之目而掩衆人之目耶

閹官無情不得謂貞倡獨不飲不可謂廉文王食子

羹佯不知非甘也董仲舒學見深而天才鈍以蜉蝣

是神龍者非但不識神龍亦不識蜉蝣王仲任撫班

固背曰此兒必為天下知名五嶺無冬殞之木南海

晉安有九熟之稻老君玉策云松脂入地千年作茯苓

苓千年作琥珀琥珀千年作石膽石膽千年作威喜

灸鼓使鳴絞絃令悲實鼓使速穿絃早絕磨刀殺馬立  
可驗也 蜉蜂窠作蠟水沫作浮石 落星埭謂吳時

星落 汲冢書云黃帝仙去其臣有夫徹者削木作黃  
帝之像卽諸侯奉之 食鵲胎令人能夜書 河伯華

陰人以八月上庚日渡河溺死天帝署作河伯 鵲鬼  
吳景帝有疾召巫覡帝試之乃殺鵲埋於苑中架小屋  
施牀帳以婦人履著其前巫云但見一白鵲不見婦人  
也帝乃重之 獼猴鬼余友人膠永叔嘗養一大獼猴

以鐵鎖鎖之於牀間犬齧殺經百日許鬼見者云承塵  
上有獼猴被瘡流血 余從祖得道能分形坐上一  
葛公與客談話又一葛公迎來送去 余見二陸之文  
百卷許似未盡也方知他人若江漢與潢汙也嵇生云  
每讀二陸之文未嘗不廢卷而歎恐其卷盡也陸子十  
篇誠謂快書其辭富者雖精思不可損也其理約者雖  
鴻筆不可益也觀此二人豈徒儒雅之士文章之人也  
抱朴子曰秦時不覺無鼻之醜陽翟憎無癭之人



陸君深識文章放蕩不作虛誕之言非不能也陸君之  
文猶玄圃玉無非夜光却後數百年若有幹跡如二陸  
猶比肩也不謂疎矣 孔鄭之門耳聽口受者皆已滅  
絕唯託竹素者可謂世寶羈鞍仁義纓鎖禮樂 余友  
人玄伯先生以儒墨作城池以機神作干戈 上世之  
人冰結而不寒資糧絕而不飢 獺多則魚擾鷹衆則  
鳥亂 盈丈之尾必非咫尺之軀尋仞之牙必非膚寸  
之口 彌衡常云孔融荀彧強可與語餘人酒甕飯囊

洪字稚川丹陽句容人其先葛天氏洪累遭火典籍盡  
乃負笈徒步借書抄寫賣薪買紙然火披覽所寫皆反  
覆有字人少能讀之性質容易冠纓垢弊或廣衣大帶  
或促身修袖或長裾曳地或短不蔽膝時人或稱抱朴  
之士因以著書名焉洪貧無僕童籬落不修常披榛出  
門排草入室洪性不干犯官長不煩擾親族 嵇君道  
作廣州刺史表洪參軍乃非所樂利得避身於南地也  
洪不園基塲猶見人博奕了不觀之 洪年十五大

作詩賦自謂可行於代至弱冠尋覽殊不稱意一時毀之

意林卷四

欽定四庫全書

意林卷五

唐 馬總 撰

周生烈子五卷

序云六蔽鄙夫燉煌周生烈字文逸張角敗後天下潰  
亂哀苦之間故著此書以堯舜作幹植仲尼作師誠

御馬失節其車是碎御天下失節四海失墜桀紂是湯  
武之梯秦項是大漢之階四逆不興則四順不昇 賢

哲不可以色貌誘之猶張羅恤鳳施筭誘麟伯樂相馬  
取之於瘦聖人相士取之於踈聽訟不如使勿訟善

斷不如使勿亂

理天網仗八柄運元象撮衆有者天

子也撫人物參天意者三公也執名節事修理者士也

臨死修善於計已晚事迫乃歸於救已微有階者易

成基無因者難成時

鳩傳隼翼羔披豹皮類似質違

表是裏非

人者天之舌物者神之口天高地厚報應

故晚辭者主之弓弩教者君之機關

矜賞若春重罰

若秋行禮若火流教若水讓一得百爭十失九

荀悅申鑒五卷

序云夫道本仁義五經以經之羣籍以緯之前鑒既明  
今又申之故曰申鑒 君臣親而有禮百官和而不同  
此治國之風也禮俗不一庶人作議此衰國之風也君  
臣爭盟大夫爭名此乖國之風也上多欲下多端法不  
定政多門此亂國之風也以割下作能附上作忠此叛  
國之風也小臣爭寵大臣爭權此害國之風也上不訪

下不諫婦言用內政行此亡國之風也 善禁者先禁

身而後人不善禁者先禁人而後身 三曰致武事四

曰禁數赦 秦之滅學也書朽於屋壁義絕於朝野

學聖不至聖可以盡生學壽不至壽可以盡命 君子

有三鑒鑒乎前鑒乎人鑒乎鏡 下不鉗口上不塞耳

則有所聞矣 思唐虞於上世瞻仲尼於中古乃知小

道者足羞也思伯夷於首陽想四皓於商山乃知穢妄

者足恥也存張騫於西極念蘇武於朔方乃知懷安者

足鄙也

仲長統昌言十卷

教化以禮義為宗禮義以典籍為本常道行於百世權  
宜用於一時高辛已往則聞其人不見其書唐虞夏殷  
則見其書不詳其事周氏已來載籍具矣 後嗣愚王

見天下莫與之違奔其私情騁其邪欲君臣宣淫上下  
同惡目極角觝之觀耳窮鄭衛之聲入則騁於婦人而  
不反出則馳於田弋而不還信任親愛寵貴后妃命移



運去不自知也

建旗伐鼓高峰明候守邊之猛將非

中國之良吏和鑾法駕清道而行便辟揖讓諸夏之威儀非夷狄之有也 董賢之於哀帝無骨肉絲髮之親

又不能傳其氣類定其繼嗣以丈夫宴接之歡自成膠

漆也 景帝顯位刺史者皆是官臣子弟猶如豺狼守

肉鬼魅侍疾曰在天之內在人之外 人愛我我愛之

人憎我我憎之 天下士有三俗選士而論族姓閥閱

一俗交游趨富貴之門二俗畏服不接於貴尊三俗天

下之士有三可賤慕名而不知實一可賤不敢正是非  
於富貴二可賤向盛背衰三可賤 天下學士有三姦  
焉實不知詳不言一也竊他人之記以成已說二也受  
無名者移知者三也 知言而不能行謂之疾此疾雖  
有天醫莫能治也同於我者何必可愛異於我者何必  
可憎知足以立難成之事能足以圖難致之功附者不  
黨踈者不遺 婦人有朝哭良人暮適他土涉歷百庭  
顏色不愧今公侯之宮美女數百卿士之家侍妾數十

晝則以醇酒淋其骨髓夜則以房室輸其血氣 人之  
性有山峙淵渟者患在不通嚴剛貶絕者患在傷士廣  
大闊蕩者患在無檢和順恭慎者患在少斷端慤清潔  
者患在拘狹辯通有辭者患在多言安舒沈重者患在  
後時好古守經者患在不變勇毅果敢者患在險害

疏濯胃臆澡雪腹心使之芬香皓潔白不可污也道德  
仁義天性也織之以成其物鍊之以致其精瑩之以發  
其光幽暗則巧人之所短會同則述人之所長負我者

我又加厚焉疑我者我又加信焉難必相恤利必相反  
事君不為君所知忠未至也與人交不為人所信義  
未至也 父母不好學業惡子孫學之可違而學也父  
母不好士惡子孫友之可違而交也 英辭雨集妙句

雲來愛惡相攻理之自然也快愜如志人之所欲也

嗽舌下泉咽之名曰胎食得道者生六翮於臂長毛羽  
於腹飛無階之蒼天度無窮之世俗 北方寒而人壽  
南方暑而人夭如蠶寒而飢則引日多溫而飽則引日

少湯契後秦益後益即皐陶子也

典論五卷

魏文帝

堯崩舜避堯子於南河之南舜崩禹避舜子於陽城禹崩益避禹子於箕山之陰事見史記如彼登山乃勤

以求高如彼浮川乃勤以求遠惟心弗勤時亦靡剋應瑒云人生固有入心答云在親曰孝施物曰仁仁者有事之實名非無事之虛稱善者道之母羣行之主

序云佞邪穢政愛惡敗俗國有此二事欲不危已不可

得也 桓靈之際閹寺專命於上布衣橫議於下干祿者殫貨以奉貴要名者傾身以事勢位成乎私門名定乎橫巷由是戶異議人殊論論無常檢事無定價長愛惡興朋黨 夷吾侈而鮑叔廉此其志不同也張竦潔而陳遵污此其行不齊也 主與民有三求求其為已勞求其為已死求其為已生 法者主之柄吏者民之命法欲簡而明吏欲公而平 詩刺豔妻書誡晨婦司隸馮方女有國色避亂揚州袁術登城見而悅之遂取

焉甚寵之諸婦教之曰將軍貴人重其志節宜數涕泣示憂愁也若如此加重馮氏後每見術垂泣術果以謂有心益寵之諸婦乃共絞殺懸之於廁言其哀怨自殺術以其不得志而死厚加殯殮袁紹妻劉氏甚妬忌紹死未殯劉氏殺其妾五人恐死者有知復能寵之乃髡頭黑面以毀其容上洛都尉王琰以功受封其妻泣於內恐琰富貴更取妻妾荊州牧劉表跨有南土子弟驕貴以酒器名三爵上者曰伯雅受七勝中雅受六

勝季雅受五勝又設大鍼於杖端有醉者輒以剗刺之  
驗其醒醉然人形性同於庶類勞則早斃逸則晚死

余喜彈碁略盡其巧少嘗作賦昔京師有東方世安張  
公子嘗恨不得與彼數子對之 太子篇序云余蒙隆

寵忝當上嗣憂惶踧踖上䟽自陳欲繁辭博稱則父子  
之間不文也欲略言直說則喜懼之心不達也里語曰  
汝無自譽觀汝作家書言其難也

魏子十卷



源靜則流清本正則末茂內修則外理形端則影直天生君子所以治小人天生小人所以奉君子無君子則無以畜小人無小人則無以養君子 錄人一善則無棄人採材一用則無棄材 人皆易華嶽以謂卑小故登之而摧傷難天以謂高大故不昇而無殃 鼎以希出而世重之釜鑪常用而世輕之 古有弟子病師數往省之師至弟子輒起因勞而致死師非不仁弟子非無禮傷於數也 薄冰當白日聚毛遇猛火雖欲遠害

其勢不可 蓼蟲在蓼則生在芥則死非蓼仁而芥賊

失於本不可也 諺曰已是而彼非不當與非爭彼是

而已非不當與是爭 君子表不隱裏明暗同度 苦

窮富貴之梯階 仲尼無契券於天下而德著古今善

惡明也鏡照醜好而人不怨法明善惡而人不恨

人物志三卷 劉邵

草之精秀者英獸之將羣者雄張良是英韓信是雄

任子十卷 名奕

學所以治已教所以治人 喜能歌舞怒能戰鬪 一

人之智不如衆人之愚一目之察不如衆目之明 生

於治長於治知世之所以治者君子也生於亂長於亂

知世之所以亂者君子也若不知治亂之所因者凡民

也 道德之懷民猶春陽之柔物履深水而不寒結木

條而不折 天之圓也不中規地之方也不中矩 山

必有阜河必有曲江漢東流必有迴復 直木無陰直

士無徒是以賢人直士常不容於世 登泰山見天下

之大不察細者視遠故也處高位知人主之貴不卹卑賤者意滿故也 治已審則可以治人治人審則可以

治天下累世一聖是繼踵千里一賢是比肩 水可乾

而不可奪濕火可滅而不可奪熱金可柔而不可奪重

石可破而不可奪堅 諺云富不學奢而奢貧不學儉

而儉人情皆能唯聖人能節之 木氣人勇金氣人剛

火氣人強而燥土氣人智而寬水氣人急而賊 神龍

不處網罟之水鳳凰不翔爵羅之鄉賢人不入危國智

者不輔亂君 蕭何守文法曹參務無苛相繼作相天  
下獲安 武帝輕人命重武功飾宮室厚賦斂土地益  
廣德惠彌狹 桓譚云王者易輔伯者難佐

篤論四卷

杜恕

水性勝火分之以釜甑則火強而水弱人性勝志分之  
以利欲則志強而性弱 考實性行莫過於鄉閭校才  
選能莫善於對策 杜氏始出帝堯在周為唐杜氏漢  
世有杜周杜欽杜篤 畿字伯侯魏書有傳畿長子理

字務仲少而機察故名曰理少子恕字務伯 陛下謂  
以今世無良才朝廷乏賢佐豈可追望前世之稷契坐  
待後來之俊乂可能治乎 恕在河東坐卧恒避父住  
處恕子預字元凱晉書有傳

體論四卷

杜恕

不動如山難知如陰人有厚德無問小節人有大舉無  
訾小故隋侯之珠不能無類 夫人臣猶如土也萬物  
載焉而不辭其重水瀆汚焉而不辭其下草木植焉而

不有其功夫行者榮辱之皂白 君子居必選鄉遊必  
擇士至人之治也處國於不傾之地積政於萬全之鄉  
載德於不止之輿行令於無竭之倉使民於不爭之塗  
開法於必得之方庶民水也君子舟也水所以載舟亦  
所以覆舟 恕性踈情但飽食而已家有書傳頗嘗涉  
歷父憂行喪在禮多愆孝聲不聞後除中郎又作黃門  
郎同朝友人問余志余答曰見大臣論議或黨甲苦乙  
所親或黨乙謗甲所親余處甲乙之間幸無毀譽耳

傅子一百二十卷

木大者發越小者敷揚土是人之母也故人有戀土之心買隣人價貴宅宅可買隣不可得也 冠堯之冠行

桀之行亦桀也服桀之服行堯之行亦堯也處市井之肆服君子之服在小人之中行賢哲之事猶夜行珮珠

玉也亦灼然矣 蜘蛛作羅蜂之作窠其巧亦妙矣況

復人乎 黃金累千不如一賢人而無廉猶衣服之無

殺食味之酸鹹 郭林宗謂仇智季曰子嘗有過否智



季曰暮飯牛牛不食搏牛一下 語曰士非璧也談者  
謂價耳談者之口猶愛憎之心 智慧多則引血氣如  
燈火之於脂膏炷大而明明則膏消炷小而暗暗則膏  
息息則能長久也 雄聲而雌視者虛偽人也氣急而  
聲重者敦實人也 蒙恬築長城人不堪苦白骨山積  
乃有歌曰生男慎勿舉生女哺用哺不見長城下白骨  
相撐拄 作黃金者是方士取草屑合金燒之故草屑  
燃金落下

太元經十四卷

梁國楊泉  
字德淵

怒如烈冬喜如溫春  
鸞鵠鳳子養甞高峙隱耀深林

不食滓穢  
內清外濁弊衣褰玉  
十里九坎牛馬低

昂  
天氣左轉星辰右行陰陽運度報返相迎  
強梁

者亡掘強者折大健者跋大利者缺激氣成風湧氣成  
雨濁霧成雪清露成霜

化清經十卷

濁者不信淵生之清而甘濯之濁矣  
動則虎發靜如

鱗潛若彼赫赫若此洋洋 將飛者翼伏將奮者足跼  
將噬者爪縮將言者口默將丈者且樸

鄒子一卷

欲知其人視其朋友蒺藜在田良苗無所措其根佞邪  
在朝忠直無所容其身 寡門不入宿臨甑不取塵避  
嫌也

成敗志三卷

孫毓  
字仲

水性雖能流不導則不通人性雖能智不教則不達學

猶植也不學將落 密者天地之際會成敗之機要故  
陰陽不密者寒暑不能以成歲棟宇不密則九層不可  
以庇身

古今通論三卷

王嬰

崑崙東南方五千里謂之神州州中有和羹鄉方三千  
里五嶽之域帝王之宅聖人所生也 倉頡造書形立  
謂之文聲具謂之字字者取其孳乳相生在於竹帛謂  
之書

中論六卷

徐偉長作  
任氏注

倚立而思遠不如速行而必至  
矯首而徇飛不如修翼之必獲  
孤居而願智不如積學之必達  
君子不卹年之將暮而憂志之有倦  
道之於人甚簡遂沒不言彪殊異  
馬遷也人之涉世譬如奕碁苟不盡道  
誰無死地但不幸耳

唐子一十卷

名滂字惠潤生  
吳太元二年

舟循川則游速人順路則不迷  
大木百尋根積深也

滄海萬仞衆流成也淵智達洞累學之功也君子以道  
成冠以道成與出門不冠則不敢行行非與則不可步  
有父不能孝有兄不能敬而論人父子之義昆弟之節  
猶彎弓而自射也 人性苟有一孝則無所不包猶樹  
根一植百枝生焉 或問齊桓晉文優劣唐子答曰論  
功則桓兄而文弟論德則文兄而桓弟 大晉應期一  
舉席卷猶震霆摧枯千鈞壓卵無餘類矣 人多患遠  
見百步而不自知眉頰知眉頰者復不能察百步也君

子守真仗信遭時不容雖有訕辱之恥幽垢之謗猶傷  
體毛耳鷹隼羣飛鳳凰遠遊小人成列君子深藏諺曰  
脂粉雖多醜面不加膏澤雖光不可潤草古人目短於  
自見故以鏡觀形心短於自治故以禮自防君子不以  
昏行易操不以夜昧易容 夫士有高世之名必有負  
俗之累有絕羣之節必要謗嗤之患白骨擬象魚目似  
珠迷聽遠望無不亂也 禍福相轉利害相生如循環  
而運九耳其兆不可見其端不可覺 良將如山如淵

人不知其感亦不知其歡 將勿離鼓旗師之耳目

暴至之榮智者不居守財不施謂之錢奴 佐闔者傷

預事者亡

秦子二卷

欲顯白於雪中馳光於日下不可得也 顏彥先難云

有味如醺而不醉人其味如黍飲之則醉何也秦子曰

醉在小人不在君子吾欲錦中而紵表不欲繡外而麻

裏猶論者寧匱於辭不匱於理 遠難知者天近難知



者人 因斧以得柯因柯以成用種一粟則千萬之粟  
滋種一仁則衆行之美備矣 鍼雖小入水則沈毛雖  
大入水則浮性自能也

梅子一卷

伊尹呂望傳說箕子夷齊柳惠顏淵莊周阮籍易地而  
居能行所不能行也阮籍孝盡其親忠不忘君明不遺  
身智不預事愚不亂治自莊周已來命世大賢其惟阮  
先生乎按其書晉人也

物理論十六卷

梁國楊泉  
字德淵

欲定天下而任小人者猶欲捕麋鹿而張兔罝不可得也  
忿飗焚衣其損多矣忿爨之熟推甑而棄之損益多  
語曰上不正下參差古者所以不欺其民也割剥富強以養貧弱何異餓耕牛乘馬而飽吠犬棄干將而礪鉛刃也  
論語聖人之至教王者之大化鄉黨篇則有朝廷之儀聘享之禮堯曰篇則有禪代之事夫文彩之在人猶榮華之在草  
給事中與高堂隆秦朗爭指

南車二子云古無此車記虛言耳先生曰爭虛空言不如及試之效也言於明帝明帝詔使作之車乃成 翻車先生居在京師城內有地作園而患無水可溉乃作翻車令童兒轉之其功百倍 天地成歲也先春而後秋人君之治也先禮而後刑救嬰孩之疾而不忍鍼艾更加他物以至死也今除肉刑死者更衆何異服他藥也肉刑雖斬其足猶能生育也張倉除肉刑每歲所殺萬計鍾繇復肉刑歲生二千人也 肉刑名者猶鳥獸登

俎而作肉

今有弱子當陷大辟問其慈父必乞以肉

刑代之苟可以生易死也有道之君能不以此加百姓

乎蛇螫在手壯夫斷其腕謂其雖斷不死也 曹義曰

繫馴駒以縲絆御悍馬以腐索今制民以輕刑亦如死

也 但知管子借耳於天下不知堯借人心而後用其

耳目 昔燕趙之間有三男共娶一女生四子後爭訟

廷尉延壽奏云禽獸生子逐母宜以還母尸三男子於

市塞一蟻孔而河決息施一車轄而覆乘止立法令

者亦宜舉要 禮云繼父服齊衰 傅子曰母捨已父  
更嫁他人與已父甚於雨絕天也 又制服恐非周孔  
所制亡秦焚書以後俗儒造之 妄進者若卵投石逃  
誅者若走赴深 蔚若春華之並發馥若秋蘭之俱茂  
樹上懸瓠非木實也背上被裘非脊毛也此似而非  
九日養親一日餓之豈得言孝飽多飢少固非孝乎  
穀馬十日一日餓之馬肥不損於義無傷不可同之一  
日餓母也 漢末有管秋陽者與弟及伴一人避亂俱

行天雨雪糧絕謂其弟曰今不食伴則三人俱死乃與  
弟共殺之得糧達舍後遇赦無罪此人可謂善士乎孔  
文舉曰管秋陽愛先人遺體食伴無嫌也荀侍中難曰  
秋陽貪生殺生豈不罪邪文舉曰此伴非會友也若管  
仲啖鮑叔貢禹食王陽此則不可向所殺者猶鳥獸而  
能言耳今有犬齧一狸狸齧一鸚鵡何足怪也昔重耳  
戀齊女而欲食狐偃叔敖怒楚師而欲食伍參賢哲之  
忿猶欲啖人而況遭窮者乎 見虎一毛不知其斑道

家笑儒者之拘儒者嗤道家之放皆不見本也 止響

以聲逐影以形姦爭流蕩不知所止也 傅子曰夫孟

軻荀卿若在孔門非唯游夏而已乃冉閔之徒也 積

薪若山縱火其下火未及燃一杯之水尚可滅也及至

火猛風起雖傾河海不能救也秦昭王是積薪而縱火

其下始皇燃而方熾二世起風而怒也 秦人視山東

之民猶猛虎之睨羣羊何所憚哉 范蠡字少伯楚三

戶人也使越滅吳已後乘輕舟遊五湖王令人寫其狀

恒朝禮之列仙云徐人也 傅氏之先出自陶唐傳說

之後 玄字休奕子咸字長虞晉書有傳 楚漢之際

有好事者作世本上錄黃帝下逮漢末班固漢書因父

得成 大孝養志其次養形養志者盡其和養形者不

失其敬 割地利已天下讐之推心及物天下歸之以

信接人天下信之不以信接人妻子疑之見疑妻子難

以事君君子修身居位非利名也在乎仁義 人皆知

滌其器莫知洗其心君子審其宗而後學明其道而後



行或云玄衡以善詩至宰相張禹以善論作帝師豈非  
儒學之榮乎傳子曰學以道達榮不以位顯吾觀班固  
漢書論國體則飾主闕而抑忠臣叙世教則貴取容而  
賤直節述時務則謹辭章而略事實非良史也 墨子

兼愛是廢親也知喪是忘憂也 漢太宗除肉刑匹夫

之仁也非天下之仁也不忍殘人之體而忍殺人故曰

匹夫 伊尹耕於有莘孰知非夏之野人呂尚釣於渭

濱孰知非殷之漁者遇湯武文王然後知其非也 面

歧路者有行迷之慮仰高山者有飛天之志或乘馬車而俱至秦者所謂形異而實同也 若謂黃帝後方有舟楫庖羲之時長江大河何所用之 經巨海者終年不見其涯測虞淵者終世不知其底故近者不可以度遠也漢世賤輶車而今貴之 青與赤謂之文赤與白謂之章白與黑謂之黼黑與青謂之黻五彩謂之繡始皇塚令匠人作機弩有人穿者即射之以人魚膏作燭 逐兔之犬終朝尋兔不失其迹雖見麋鹿不暇顧

也 漢高祖度闊而網踈故後世推誠而簡直光武教  
一而網密故後世守常而禮義魏武紕亂以尚猛天下  
修法而貴理 形自正不求影之直而影自直聲之平  
不求響之和而響自和德之崇不求名之遠而名自遠  
西國胡言蘇合香是獸便中國獸便而臭忽聞西極  
獸便而香則不信矣 必得崑山之玉而後寶則荆璞  
無夜光之美必須南國之珠而後珍則隋侯無明月之  
稱 始皇遠遊並海而不免平臺之變及葬驪山尋見

發掘今有鉛錫之鋌雖歐冶百鍊猶不如瓦刀有駕駘  
之馬雖造父駕之終不及飛兔絕景質鈍故也土不可  
作鐵而可以作瓦 相者曰三亭九侯定於一尺之面  
愚智勇怯形於一寸之目天倉金匱以別貧富貴賤

光武鳳翔於南陽燕雀化作鵷鷺二漢之臣煥爛如三  
辰之附長天長平之卒磊落如秋草之中繁霜勢使然  
也 長人數丈身橫九畝兩頭異頸四臂共骨老人生  
角男女變化何益於賢愚耶 豈有太一之君坐於庶

人之座魁罡之神存於匹婦之室 傅子曰諸葛亮誠一時之異人也治國有分御軍有法積功興業事得其機入無遺刃出有餘糧知蜀本弱而危故持重以鎮之若姜維欲速立其功勇而無決也 馬先生綾機先生

名鈞字衡天下之名巧也綾機本五十綜五十篝六十綜六十篝先生乃易二篝奇文異變因感而作自能成陰陽無窮也指南車見周官亦見鬼谷子先生作 辯

上下者莫正乎位興國家者莫貴乎人統內外者莫齊

乎分宣德教者莫明乎學 秉綱而目自張執本而末  
自從善賞者賞一善而天下之善皆勸善罰者罰一惡  
而天下之惡皆除矣 世質則官少時文則吏多有虞  
氏官五十夏后官一百殷有二百周有三百國典之墜  
猶位喪也位之不建名理廢也 以譽取人則權勢移  
於下而朋黨之交用以功進士則有德者未必授而凡  
下之人或見任也君子內洗其心以虛受人外設法度  
立不易方今人稱古多賢患世無人退不三思坐語一

世豈不惑邪 人之性如水焉置之圓則圓置之方則方澄之則渟而清動之則流而濁先王知中流之易擾亂故隨而教之謂其偏好者故立一定之法龍舟整檝王良不能執也騏驎齊行越人不敢御也各有所能構大廈者先擇匠而後棟材治國家者先擇佐而後定民人之學如渴而飲河海大飲則大盈小飲則小盈大觀則大見小觀則小見 金以利用錢以輕流此二物飢不可食 入粟補吏是賣官也罪人以贖是縱惡也

世富錢流則禁盜鑄錢世貧錢滯則禁盜壞錢 天

下之害莫害於女飾一頭之飾盈千金之價婢妾之服  
亦重四海之珍 公卿大夫刻石作碑鵠石作虎碑虎  
崇偽陳於三衢妨功喪德異端並起撞亡秦之鍾作鄭  
衛之樂欲以興治豈不難哉 賞不避踈賤罰不避親  
貴貴有常名而賤不得冒尊有定位而卑不敢逾經之  
以道德緯之以仁義織之以禮法既成而後用之謂有  
孝廉秀才之貢或千里望風承聲而舉故任實者漸消



積虛者日長 聞一善言見一善事行之唯恐不及聞

一惡言見一惡事遠之唯恐不遠 懸千金於市市人

不敢取者分定也委一錢於路童兒爭之者分未定也

三皇遺道而尚德五帝先仁而後義三王先義而後

辭 鴻毛一羽在水而沒者無勢也黃金萬鈞在舟而

浮者託舟之勢也 擬金人銘作口銘曰神以感通心

由口宣福生有兆禍來有端情莫多妄口莫多言蟻孔

潰河溜川傾山病從口入患自口出存亡之機開闔之

術口與心謀安危之源樞機之發榮辱隨焉 夫有公  
心必有公道愛已者不能不愛憎已者不能不憎民富  
則安鄉重家敬上而從教貧則危鄉輕家相聚而犯上  
飢寒切身而不行非者寡矣 我欲戰而彼不欲戰者  
我鼓而進之若山崩河溢當其衝者摧值其鋒者破所  
謂疾雷不暇掩耳則又誰禦之 吳起吮瘡者之膿積  
恩以感下也史記云吳起吮臃畫戰目相見夜戰耳相  
聞得利同勢失利相救 陸田者命懸於天人力雖修

水旱不時則一年之功棄矣水田制之由人人力苟修則地利可盡 傳子曰聖人之道如天地諸子之異如四時四時相反天地合而通焉且易不同採金攻玉涉艱難也路不險則無以知馬之良任不重則無以知人之材 君子相見非但興善將以攻惡惡不廢則善不興 療暑莫如親水救寒莫如重裘止謗莫如修身

善釣者不易淵而釣君子不隣席而追道 小人恥其面不如子都君子恥其行不如舜禹故小人貴明鑒君

子尚至言 射以平志御以和心書以綴事數以理煩  
利如激風之至暴雨之集不論是非不議直曲期於  
不窮激於必勝 辯者別也言其善分別事類非謂言  
辭捷給而凌善人也 聖人蹈機掘杼織成天地使萬  
物順焉人倫正焉 登高而建旗則所示者廣順風而  
奮鐸則所聞者遠非旌色並明鐸聲遠長所託得地而  
況富貴施政令乎 良農不患疆場之不修而患風雨  
之不節君子不患道德之不建而患其時之不至 聖

人之世不交遊也周道衰而交遊興古之交也近今之  
交也遠古之交也求賢今之交也為名取不由鄉黨考  
行不本閨閭多助者則稱賢才少愛者則謂不肖馬  
必待乘而後致遠醫必待使而後愈疾賢者待用而後

興理

意林卷五